

四庫全書

經部

欽定四庫全書

周官新義卷十二

宋 王安石 撰

夏官一

惟王建國辨方正位體國經野設官分職以為民極乃  
立夏官司馬使帥其屬而掌邦政以佐王平邦國政官  
之屬大司馬卿一人小司馬中大夫二人軍司馬下大  
夫四人輿司馬上士八人行司馬中士十有六人旅下  
士三十有二人府六人史十有六人胥三十有二人徒

三百有二十人凡制軍萬有二千五百人為軍王六軍  
大國三軍次國二軍小國一軍軍將皆命卿二千有五  
百人為師師帥皆中大夫五百人為旅旅帥皆下大夫  
百人為卒卒長皆上士二十五人為兩兩司馬皆中士  
五人為伍伍皆有長一軍則二府六史胥十人徒百人  
司勳上士二人下士四人府二人史四人胥二人徒二  
十人

馬質中士二人府一人史二人賈四人徒八人

量人下士二人府一人史四人徒八人

小子下士二人史二人徒八人

羊人下士二人史一人賈二人徒八人

司燿下士二人徒六人

掌固上士二人下士八人府二人史四人胥四人徒四十人

司險中士二人下士四人史二人徒四十人

掌疆中士八人史四人胥十有六人徒百有六十人

候人上士六人下士十有二人史六人徒百有二十人  
環人下士六人史二人徒十有二人

挈壺氏下士六人史二人徒十有二人

射人下大夫二人上士四人下士八人府二人史四人  
胥二人徒二十人

服不氏下士一人徒四人

射鳥氏下士一人徒四人

羅氏下士一人徒八人

掌畜下士二人史二人胥二人徒二十人

司士下大夫二人中士六人下士十有二人府二人史  
四人胥四人徒四十人

諸子下大夫二人中士四人府二人史二人胥二人徒  
二十人

司右上士二人下士四人府四人史四人胥八人徒八  
十人

虎賁氏下大夫二人中士十有二人府二人史八人胥

八十人虎士八百人

旅賁氏中士二人下士十有六人史二人徒八人

節服氏下士八人徒四人

方相氏狂夫四人

太僕下大夫二人小臣上士四人祭僕中士六人御僕

下士十有二人府二人史四人胥二人徒二十人

隸僕下士二人府一人史二人胥四人徒四十人

弁師下士二人工四人史二人徒四人

司甲下大夫二人中士八人府四人史八人胥八人徒八十人

司兵中士四人府二人史四人胥二人徒二十人

司戈盾下士二人府一人史二人徒四人

司弓矢下大夫二人中士八人府四人史八人胥八人徒八十人

繕人上士二人下士四人府一人史二人胥二人徒二十人



藁人中士四人府二人史四人胥二人徒二十人

戎右中大夫二人上士二人

齊右下大夫二人

道右上士二人

大馭中大夫二人

戎僕中大夫二人

齊僕下大夫二人

道僕上士十有二人

田僕上士十有二人

馭夫中士二十人下士四十人

校人中大夫二人上士四人下士十有六人府四人史  
八人胥八人徒八十人

趣馬下士皂一人徒四人

巫馬下士二人醫四人府一人史二人賈二人徒二十  
人

牧師下士四人胥四人徒四十人

庖人下士閑二人史二人徒二十人

圉師乘一人徒二人圉人良馬匹一人駑馬麗一人

職方氏中大夫四人下大夫八人中士十有六人府四

人史十有六人胥十有六人徒百有六十人

土方氏上士五人下士十人府二人史五人胥五人徒

五十人

懷方氏中士八人府四人史四人胥四人徒四十人

合方氏中士八人府四人史四人胥四人徒四十人

訓方氏中士四人府四人史四人胥四人徒四十人  
形方氏中士四人府四人史四人胥四人徒四十人  
山師中士二人下士四人府二人史四人胥四人徒四  
十人

川師中士二人下士四人府二人史四人胥四人徒四  
十人

遼師中士四人下士八人府四人史八人胥八人徒八  
十人

金  
卷十二  
匡人中士四人史四人徒八人

譚人中士四人史四人徒八人

都司馬每都上士二人中士四人下士八人府二人史八人胥八人徒八十人

家司馬各使其臣以正於公司馬

大司馬之職掌建邦國之九灋以佐王平邦國制畿封國以正邦國設儀辨位以等邦國進賢興功以作邦國建牧立監以維邦國制軍詰禁以糾邦國施貢分職以

任邦國簡稽鄉民以用邦國均守平則以安邦國比小事大以和邦國

以九伐之灋正邦國馮弱犯寡則眚之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令陵政則杜之外內亂鳥獸行則滅之

正月之吉始和布政于邦國都鄙乃縣政象之灋于象魏使萬民觀政象挾日而斂之乃以九畿之籍施邦國

之政職方千里曰國畿其外方五百里曰侯畿又其外  
方五百里曰甸畿又其外方五百里曰男畿又其外方  
五百里曰采畿又其外方五百里曰衛畿又其外方五  
百里曰蠻畿又其外方五百里曰夷畿又其外方五百  
里曰鎮畿又其外方五百里曰蕃畿

方千里曰畿則禹貢所謂甸服也甸服面五百里則  
為方千里矣其外侯畿甸畿禹貢所謂侯服也又其  
外男畿采畿禹貢所謂綏服也又其外衛畿蠻畿夷

貢所謂要服也又其外夷畿鎮畿禹貢所謂荒服也  
又其外蕃畿在禹貢五服之外

凡令賦以地與民制之上地食者參之二其民可用者  
家三人中地食者半其民可用者二家五人下地食者  
參之一其民可用者家二人

中春教振旅司馬以旗致民平列陳如戰之陳辨鼓鐸  
蠲饒之用王執路鼓諸侯執賁鼓軍將執晉鼓師帥執  
提旅師執鼙卒長執饒兩司馬執鐸公司馬執蠲



鼓陽也尊者執之金陰也卑者執之饒以止鼓與陽  
更用事焉故卒長執之通鼓節鼓佐陽而已故兩司  
馬公司馬執之謂之公以別於私亦稱司馬所謂家  
司馬是也

以教坐作進退疾徐疏數之節遂以蒐田有司表貉誓  
民鼓遂圍禁火弊獻禽以祭社

中夏教茆舍如振旅之陳羣吏撰車徒讀書契辨號名  
之用帥以門名縣鄙各以其名家以號名鄉以州名野

以邑名百官各象其事以辨軍之夜事其他皆如振旅  
遂以苗田如蒐之灋車弊獻禽以享禴

中秋教治兵如振旅之陳辨旗物之用王載太常諸侯  
載旂軍吏載旗師都載旛鄉遂載物郊野載旒百官載  
旗各書其事與其號焉其他皆如振旅遂以獮田如蒐  
田之灋羅弊致禽以祀禘

中冬教大閱前期羣吏戒衆庶脩戰灋虞人菜所田之  
野為表百步則一為三表又五十步為一表田之日司

馬建旗于後表之中羣吏以旗揚鼓鐸鐃各帥其民而致質明弊旗誅後至者乃陳車徒如戰之陳皆坐羣吏聽誓于陳前斬牲以左右徇陳曰乃不用命者斬之中軍以鼙令鼓鼓人皆三鼓司馬振鐸羣吏作旗車徒皆作鼓行鳴鐃車徒皆行及表乃止三鼓撝鐸羣吏弊旗車徒皆坐又三鼓振鐸作旗車徒皆作鼓進鳴鐃車驟徒趨及表乃止坐作如初乃鼓車馳徒走及表乃止鼓戒三關車三發徒三刺乃鼓退鳴鐃且却及表乃止

坐作如初遂以狩田以旌為左右和之門羣吏各帥其車徒以敘和出左右陳車徒有司平之旗居卒間以分地前後有屯百步有司巡其前後險野人為主易野車為主既陳乃設驅逆之車有司表貉于陳前中軍以鼙令鼓鼓人皆三鼓羣司馬振鐸車徒皆作遂鼓行徒銜枚而進大獸公之小禽私之獲者取左耳及所弊鼓皆駢車徒皆譟徒乃弊致禽饁獸于郊入獻禽以享烝使民以其死刑誅不如是之嚴則民弗為使矣然前

期戒衆庶而後至可誅旣陳而誓然後不用命者可斬

及師大合軍以行禁令以救無辜伐有罪若大師則掌其戒令蒞大卜帥執事蒞釁主及軍器及致建太常比軍衆誅後至者及戰巡陳眡事而賞罰若師有功則左執律右秉鉞以先愷樂獻于社若師不功則厭而奉主車王弔勞士庶子則相大役與慮事屬其植受其要以待攷而賞誅大會同則帥士庶子而掌其政令若大

射則合諸侯之六耦大祭祀饗食羞牲魚授其祭大喪  
平士大夫喪祭奉詔馬牲

小司馬之職掌凡小祭祀會同饗射師田喪紀掌其事  
如大司馬之灋

軍司馬

闕

輿司馬

闕

行司馬

闕

司勲掌六鄉賞地之灋以等其功王功曰勲國功曰功

民功曰庸事功曰勞治功曰力戰功曰多凡有功者銘  
書於王之大常祭於大烝司勲詔之大功司勲藏其貳  
掌賞地之政令凡賞無常輕重眡功凡頒賞地參之一  
食唯加田無國正

大烝冬之大享當是時百物皆報焉祭有功宜矣

馬質掌質馬馬量三物一曰戎馬二曰田馬三曰駕馬  
皆有物賈綱惡馬凡受馬於有司者書其齒毛與其賈  
馬死則旬之內更旬之外入馬耳以其物更其外否馬

及行則以任齊其行若有馬訟則聽之禁原蠶者

綱謂以縻索維之所以制其奔踴也

量人掌建國之灋以分國為九州營國城郭營后宮量  
市朝道巷門渠造都邑亦如之營軍之壘舍量其市朝  
州涂軍社之所里邦國之地與天下之涂數皆書而藏  
之凡祭祀饗賓制其從獻脯燔之數量掌喪祭奠窆之  
俎實凡宰祭與鬱人受罍歷而皆飲之

受罍歷而皆飲之受罍傳之他器而皆飲之也鬱人



於祭祀達其氣臭以始之量人祭祀制其量數以成之二者本末相成皆所以致福而達臭以始之者主王制量數以成之者主宰故鬱人大祭祀與量人受舉斚之卒爵而飲之量人宰制則與鬱人受斚歷而皆飲之皆飲所以致福者盡矣

小子掌祭祀羞羊肆羊殽肉豆而掌珥于社稷祈于五祀凡沈辜候禳飾其牲饗邦器及軍器凡師田斬牲以左右徇陳祭祀贊羞受徹焉

羊人掌羊牲凡祭祀飾羔祭祀割羊牲登其首凡祈珥共其羊牲賓客共其灋羊凡沈辜侯禳釁積共其羊牲若牧人無牲則受布于司馬使其賈買牲而共之

飾羔若禮所謂飾羔鴈者以績也灋羊謂牢禮之灋所用也

司燿掌行火之政令四時變國火以救時疾季春出火民咸從之季秋內火民亦如之時則施火令凡祭祀則祭燿凡國失火野焚萊則有刑罰焉

舉火曰燿祭祀用燿故祭焉

掌固掌脩城郭溝池樹渠之固頒其士庶子及其衆庶之守設其飾器分其財用均其稍食任其萬民用其材器凡守者受灋焉以通守政有移甲與其役財用唯是得通與國有司帥之以贊其不足者晝三巡之夜亦如之夜三鑿以號戒

士者公卿大夫之適而已命者也庶子者國子之倅而未命者也衆庶則其地之人民通守者也夫士庶

子所使帥衆庶而頒其守則遠近均焉勞逸更焉分其財用以給守事均其稍食以養守者

若造都邑則治其固與其守灋凡國都之竟有溝樹之固郊亦如之民皆有職焉若有山川則因之

司險掌九州之圖以周知其山林川澤之阻而達其道路設國之五溝五涂而樹之林以為阻固皆有守禁而達其道路國有故則藩塞阻路而止行者以其屬守之唯有節者達之

掌疆闕

候人各掌其方之道治與其禁令以設候人若有方治則帥而致于朝及歸送之于竟

方各設其人以候有方治者致之送之

環人掌致師察軍慝環四方之故巡邦國搏諜賊訟敵國揚軍旅降圍邑

搏諜賊以下皆環人巡邦國之事

挈壺氏掌挈壺以令軍井挈轡以令舍挈畚以令糧凡

軍事縣壺以序聚橐凡喪縣壺以代哭者皆以水火守之分以日夜及冬則以火爨鼎水而沸之而沃之

射人掌國之三公孤卿大夫之位三公北面孤東面卿大夫西面其摯三公執璧孤執皮帛卿執羔大夫鴈諸侯在朝則皆北面詔相其灋

三公執璧則以有君之體而不致其用也

若有國事則掌其戒令詔相其事掌其治達

射之為道利以直達有括則不至治達如之故掌治

達者在射人也

以射灋治射儀王以六耦射三侯三獲三容樂以騶虞  
九節五正諸侯以四耦射二侯二獲二容樂以貍首七  
節三正孤卿大夫以三耦射一侯一獲一容樂以采蘋  
五節二正士以三耦射豳侯一獲一容樂以采芣五節  
二正若王大射則以貍步張三侯王射則令去侯立于  
後以矢行告卒令取矢祭侯則為位與太史數射中佐  
司馬治射正

侯而祭之則神無不在而君子無所不用其至

祭祀則贊射牲相孤卿大夫之灋儀會同朝覲作大夫介凡有爵者大師令有爵者乘王之倅車有大賓客則作卿大夫從戒太史及大夫介大喪與僕人遷尸作卿大夫掌事比其廬不敬者苛罰之

服不氏掌養猛獸而教擾之凡祭祀共猛獸賓客之事則抗皮射則贊張侯以旌居之而待獲

抗皮贊張侯待獲皆服不服之意故服不氏掌之



射鳥氏掌射鳥祭祀以弓矢毆鳥鳶凡賓客會同軍旅亦如之射則取矢矢在侯高則以并夾取之

先王置官大抵兼職射鳥氏雖無所兼其所射以共賓祭膳獻亦足以償祿矣使毆鳥鳶以并夾取矢雖若不急然上下無乏事則以事為之制故也

羅氏掌羅鳥鳥蜡則作羅襦中春羅春鳥獻鳩以養國老行羽物

掌畜掌養鳥而阜蕃教擾之祭祀共卵鳥歲時貢鳥物

共膳獻之鳥

共卵及鳥物與獸同義翠翬羽翮之屬是也

司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數以詔王治以德詔爵以功詔祿以能詔事以久奠食唯賜無常

賜出於王之恩恩有厚薄賜有多寡又何常之有且賜而有常則無以作福矣

正朝儀之位辨其貴賤之等王南鄉三公北面東上孤東面北上卿大夫西面北上王族故士虎士在路門之右南面東上大僕大右大僕從者在路門之左南面西上

鄉明以聽天下者王也故南鄉面王而答之者公也故北面孤佐王者也故東面卿大夫佐王者也故西面王族故士虎士大僕大右大僕從者則從王者也故南面順王所嚮焉三公東上則北面以左為右故

也自孤以下皆以近尊為上公以下皆言面王獨言嚮不斥其體尊故也

司士擯孤卿特揖大夫以其等旅揖士旁三揖王還揖門左揖門右大僕前五入內朝皆退

掌國中之士治凡其戒令掌擯士者膳其摯凡祭祀掌士之戒令詔相其灋事及賜爵呼昭穆而進之帥其屬而割牲羞俎豆凡會同作士從賓客亦如之作士適四方使為介大喪作士掌事作六軍之士執披凡士之有

守者令哭無去守國有故則致士而頒其守凡邦國三歲則稽士任而進退其爵祿

諸子掌國子之倅掌其戒令與其教治辨其等正其位國有大事則帥國子而致於天子惟所用之若有兵甲之事則授之車甲合其卒伍置其有司以軍灋治之司馬弗正凡國正弗及

司馬弗正國正弗及則是諸子正之天子用之而已大祭祀正六牲之體凡樂事正舞位授舞器大喪正羣

子之服位會同賓客作羣子從凡國之政事國子存遊  
倅使之脩德學道春合諸學秋合諸射以攷其藝而進  
退之

司右掌羣右之政令凡軍旅會同合其車之卒伍而比  
其乘屬其右凡國之勇力之士能用五兵者屬焉掌其  
政令

比其乘則比其乘之馬使齊力屬其右則屬其右之  
人使同心先王旣合萬民之卒伍以時習之皆使知

戰又屬勇力之士能用五兵者於司右使掌其政令則軍旅之事有選鋒以待敵齊民得免死焉無事之時武夫皆寓於官府無所奮其私鬪矣

虎賁氏掌先後王而趨以卒伍軍旅會同亦如之舍則守王閑王在國則守王宮國有大故則守王門大喪亦如之及葬從遣車而哭適四方使則從士大夫若道路不通有徵事則奉書以使於四方

旅賁氏掌執戈盾夾王車而趨左八人右八人車止則

持輪凡祭祀會同賓客則服而趨喪紀則衰葛執戈盾  
軍旅則介而趨

旅賁則王衛之尤親者王吉服則亦吉服王凶服則  
亦凶服王戎服則亦戎服亦與王同其憂樂也

節服氏掌祭祀朝覲袞冕六人維王之太常諸侯則四  
人其服亦如之郊祀裘冕二人執戈送逆尸從車

方相氏掌蒙熊皮黃金四目玄衣朱裳執戈揚盾帥百  
隸而時難以索室毆疫大喪先匱及墓入壙以戈擊四



隅毆方良



欽定四庫全書

經部

周官新義卷十三至十六

詳校官監察御史<sub>臣</sub>祝德麟

刑部郎中<sub>臣</sub>許兆椿覆勘

謄錄監生<sub>臣</sub>秦澧

謄錄貢生<sub>臣</sub>吳士英

欽定四庫全書

周官新義卷十二

宋 王安石 撰

夏官二

大僕掌正王之服位出入王之大命掌諸侯之復逆王  
眡朝則前正位而退入亦如之

王眡朝眡治朝也

建路鼓于太寢之門外而掌其政以待達窮者與遽令  
聞鼓聲則速逆御僕與御庶子祭祀賓客喪紀正王之

服位詔灋儀贊王牲事王出入則自左馭而前驅

窮者欲速達甚于遽令王之牲事以事鬼神苟外不能治其人內不能治其身雖日用牲祭鬼神猶弗享也大臣衆矣所與治其人莫尊於大宰近臣衆矣所與正其身莫親於大僕故贊牲事以此兩官

凡軍旅田役贊王鼓救日月亦如之大喪始崩戒鼓傳達于四方寔亦如之縣喪首服之灋于宮門掌三公孤卿之弔勞王燕飲則相其灋王射則贊弓矢王眡燕朝

則正位掌擯相王不眠朝則辭於三公及孤卿

小臣掌王之小命詔相王之小灋儀掌三公及孤卿之復逆正王之燕服位王之燕出入則前驅大祭祀朝覲沃王盥小祭祀賓客饗食賓射掌事如大僕之灋掌士大夫之弔勞凡大事佐大僕

祭僕掌受命于王以眡祭祀而警戒祭祀有司糾百官之戒具既祭帥羣有司而反命以王命勞之誅其不敬者大喪復于小廟凡祭祀王之所不與則賜之禽都家

亦如之凡祭祀致福者展而受之

肆師誅其慢慢謂不肅也祭祀誅其不敬則非不肅之謂也祭僕掌受命于上以眡祭祀隸僕掌五寢掃除糞洒之事王皆以故習而親焉故也既置夏采掌復復之正事又以二僕參焉復盡愛之道求所以生之不以方而已

御僕掌羣吏之逆及庶民之復與其弔勞大祭祀相盥而登大喪持翼掌王之燕令以序守路鼓

庶民之復大司寇所謂遠近惇獨老幼之欲有復于上者故太僕言建路鼓以待達窮者聞鼓聲則速逆御僕也

隸僕掌五寢之埽除糞洒之事祭祀脩寢王行洗乘石掌蹕宮中之事大喪復于小寢大寢

弁師掌王之五冕皆玄冕朱裏延紐五采繅十有二就皆五采玉十有二玉筭朱紘諸侯之繅旂九就璫玉三采其餘如王之事繅旂皆就玉璜玉筭王之皮弁會五

采玉璫象邸玉筭王之弁經弁而加環經諸侯及孤卿大夫之冕韋弁皮弁弁經各以其等為之而掌其禁令五采備采也十有二就備數也玉十有二備物也玉筭貫其上以象德也

司甲

闕

司兵掌五兵五盾各辨其物與其等以待軍事及授兵從司馬之灋以頒之及其受兵輸亦如之及其用兵亦如之祭祀授舞者兵大喪獻五兵軍事建車之五兵會



同亦如之

司戈盾掌戈盾之物而頒之祭祀授旅賁及故士戈盾授舞者兵亦如之軍旅會同授貳車戈盾建乘車之戈盾授旅賁及虎士戈盾及舍設藩盾行則斂之

司弓矢掌六弓四弩八矢之灋辨其名物而掌其守藏與其出入中春獻弓弩中秋獻矢箛及其頒之王弓弧弓以授射甲革楯質者夾弓庾弓以授射豸侯鳥獸者唐弓大弓以授學射者使者勞者其矢箛皆從其弓凡

弩夾庾利攻守唐大利車戰野戰凡矢枉矢絜矢利火  
射用諸守城車戰殺矢鏃矢用諸近射田獵矰矢箝矢  
用諸弋射恒矢庾矢用諸散射天子之弓合九而成規  
諸侯合七而成規大夫合五而成規士合三而成規句  
者謂之弊弓

凡祭祀共射牲之弓矢澤共射楫質之弓矢大射燕射  
共弓矢如數并夾大喪共明弓矢凡師役會同頒弓弩  
各以其物從授兵甲之儀田弋充籠簾矢共矰矢凡亡

矢者弗用則更

繕人掌王之用弓弩矢箠矰弋扶拾掌詔王射贊王弓矢之事凡乘車充其籠箠載其弓弩既射則斂之無會計

橐人掌受財于職金以齎其工弓六物為三等弩四物亦如之矢八物皆三等箠亦如之春獻素秋獻成書其等以饗工乘其事試其弓弩以下上其食而誅賞乃入功于司弓矢及繕人凡齎財與其出入皆在橐人以待

會而攷之亡者闕之

入于繕人則共王用也

戎右掌戎車之兵革使詔贊王鼓傳王命于陳中會同充革車盟則以玉敦辟盟遂役之贊牛耳桃茢

戎右與君同車在車之右執戈盾備非常并充兵中役使故云掌之

齊右掌祭祀會同賓客前齊車王乘則持馬行則陪乘凡有牲事則前馬

金路以賓而謂之齊車者王敬賓事如祭故也

道右掌前道車王出入則持馬陪乘如齊車之儀自車上諭命于從車詔王之車儀王式則下前馬主下則以蓋從

齊右王弗乘則前馬方乘則持馬既乘而行則陪乘三者皆與齊右同

大馭掌馭玉路以祀及祀軼王自左馭馭下祝登受轡犯軼遂驅之及祭酌僕僕左執轡右祭兩軼祭軼乃飲

凡馭路行以肆夏趨以采薺凡馭路儀以鸞和為節

戎僕掌馭戎車掌王倅車之政正其服犯軼如玉路之儀凡巡守及兵車之會亦如之掌凡戎車之儀

齊僕掌馭金路以賓朝覲宗遇饗食皆乘金路其灋儀各以其等為車送逆之節

道僕掌馭象路以朝夕燕出入其灋儀如齊車掌貳車之政令

田僕掌馭田路以田以鄙掌佐車之政設驅逆之車令

獲者植旌及獻比禽凡田王提馬而走諸侯晉大夫馳提節之晉進之馳則亟進之尊者安舒卑者感速馭夫掌馭貳車從車使車分公馬而駕治之

貳車副車從車謂屬車也使車謂使者所乘之車

校人掌王馬之政辨六馬之屬種馬一物戎馬一物齊馬一物道馬一物田馬一物駑馬一物凡頒良馬而養乘之乘馬一師四圉三乘為皐皐一趣馬三皐為繫繫一馭夫六繫為廋廋一僕夫六廋成校校有左右駕馬

三良馬之數麗馬一圉八麗一師八師一趣馬八趣馬  
一馭夫天子十有二閑馬六種邦國六閑馬四種家四  
閑馬二種凡馬特居四之一

趣馬下士皐一人繫一馭夫則下士一人

春祭馬祖執駒夏祭先牧頒馬攻特秋祭馬社臧僕冬  
祭馬步獻馬講馭夫凡大祭祀朝覲會同毛馬而頒之  
飾幣馬執扑而從之凡賓客受其幣馬大喪飾遣車之  
馬及葬埋之田獵則帥驅逆之車凡將事于四海山川



則飾黃駒凡國之使者共其幣馬凡軍事物馬而頒之  
等馭夫之祿宮中之稍食

攻特者駒之不可習者庖人攻之矣及成馬而不可  
習則校人攻之臧僕則簡馭者簡其臧亦簡其或不  
臧

趣馬掌贊正良馬而齊其飲食簡其六節掌駕說之頒  
辨四時之居治以聽馭夫

巫馬掌養疾馬而乘治之相醫而藥攻馬疾受財于校

人馬死則使其賈粥之入其布于校人

牧師掌牧地皆有厲禁而頒之孟春焚牧中春通淫掌其政令凡田事替焚萊

頒其地于牧人

廋人掌十有二閑之政教以阜馬佚特教駢攻駒及祭馬祖祭閑之先牧及執駒散馬耳圉馬正校人員選馬八尺以上為龍七尺以上為駮六尺以上為馬

政以正之教以導之阜馬者養馬而阜之既阜矣又

佚特以蕃之既蕃矣又教駢以成之攻駢則不可教者及其未駢攻之也圍馬則成馬而圍之圍馬以校人執駢為節也正其員使員稱馬數正其選使選惟其能小大異名使各從其類以待乘頒及以為種圍師掌教圍人養馬春除蓐覺殿始牧夏庠馬冬獻馬射則充楫質茨牆則翦闔

次草謂之茨詩曰牆有茨苦謂之闔以剉草為苦

圍人掌養馬芻牧之事以役圍師凡賓客喪紀牽馬而

入陳廩馬亦如之

職方氏掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九穀六畜之數要周知其利害乃辨九州之國使同貫利

掌天下之圖以掌天下之地則所掌非特圖也又掌其地焉

東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸

其穀宜稻

正南曰荊州其山鎮曰衡山其澤數曰雲夢其川江漢  
其浸潁湛其利丹銀齒革其民一男二女其畜宜鳥獸  
其穀宜稻

河南曰豫州其山鎮曰華山其澤數曰圃田其川滎雒  
其浸波澨其利林漆絲枲其民二男三女其畜宜六擾  
其穀宜五種

正東曰青州其山鎮曰沂山其澤數曰望諸其川淮泗

其浸沂沭其利蒲魚其民二男二女其畜宜雞狗其穀  
宜稻麥

河東曰兗州其山鎮曰岱山其澤藪曰大野其川河洿  
其浸盧維其利蒲魚其民二男三女其畜宜六擾其穀  
宜四種

正西曰雍州其山鎮曰嶽山其澤藪曰弦蒲其川涇汭  
其浸渭洛其利玉石其民三男二女其畜宜牛馬其穀  
宜黍稷

東北曰幽州其山鎮曰醫無閭其澤藪曰獫狁其川河  
涉其浸菑時其利魚鹽其民一男三女其畜宜四擾其  
穀宜三種

河內曰冀州其山鎮曰霍山其澤藪曰楊紆其川漳其  
浸汾潞其利松柏其民五男三女其畜宜牛羊其穀宜  
黍稷

正北曰并州其山鎮曰恒山其澤藪曰昭餘祁其川虜  
池嘔夷其浸涑易其利布帛其民二男三女其畜宜五

擾其穀宜五種

乃辨九服之邦國方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰藩服凡邦國千里封公以方五百里則四公方四百里則六侯方三百里則七伯方二百里則二十五子方百里則百男以



周知天下

凡邦國小大相維王設其牧制其職各以其所能制其  
貢各以其所有王將巡守則戒于四方曰各脩平乃守  
攷乃職事無敢不敬戒國有大刑及王之所行先道帥  
其屬而巡戒令王殷國亦如之

九州之序禹貢始於冀次以兗而終於雍職方始於  
揚次以荊而終於并者蓋禹貢言治水之序職方言  
遠近之序治水自帝都而始然後順水性所便自下

而上故自充至雍而止以遠近言之則周之化自北而南以南為遠故關雎鵲巢之詩分為二南漢廣亦言文王之道被于南國德化所及以遠為至故也始於揚州則以揚在東南次以荆則以荆在正南終於并則以并在正北先遠而後近也

土方氏掌土圭之灋以致日景以土地相宅而建邦國都鄙以辨土宜土化之灋而授任地者王巡守則樹王舍

懷方氏掌來遠方之民致方貢致遠物而送逆之達之以節治其委積館舍飲食

逆送之以為之禮達之節使無留難治其委積館舍飲食使有所資賴此所以懷之也

合方氏掌達天下之道路通其財利同其數器壹其度量除其怨惡同其好善

訓方氏掌道四方之政事與其上下之志誦四方之傳道正歲則布而訓四方而觀新物

形方氏掌制邦國之地域而正其封疆無有華離之地  
使小國事大國大國比小國

華與為國君削爪者華之同義

山師掌山林之名辨其物與其利害而頒之于邦國使  
致其珍異之物

稻人澤草所生種之芒種所謂利有如此者非特中  
人用而已王孫滿曰夏之方有德也鑄鼎象物百物  
而為之備使民知神姦故民入川澤山林不逢不若

魑魅魍魎莫能逢之所謂害有如此者非特毒物及  
螫噬之蟲獸而已

川師掌川澤之名辨其物與其利害而頒之于邦國使  
致其珍異之物

邊師掌四方之地名辨其丘陵墳衍邊隰之名物之可  
以封邑者

匡人掌達灋則匡邦國而觀其隱使無敢反側以聽王  
命

擇人掌誦王志道國之政事以巡天下之邦國而語之  
使萬民和說而正王面

都司馬掌都之士庶子及其衆庶車馬兵甲之戒令以  
國灋掌其政學以聽國司馬家司馬亦如之

欽定四庫全書

周官新義卷十四

宋 王安石 撰

秋官一

惟王建國辨方正位體國經野設官分職以為民極乃立秋官司寇使帥其屬而掌邦禁以佐王刑邦國刑官之屬大司寇卿一人小司寇中大夫二人士師下大夫四人鄉士上士八人中士十有六人旅下士三十有二人府六人史十有二人胥十有二人徒百有二十人

遂士中士十有二人府六人史十有二人胥十有二人  
徒百有二十人

縣士中士三十有二人府八人史十有六人胥十有六人  
徒百有六十人

方士中士十有六人府八人史十有六人胥十有六人  
徒百有六十人

訝士中士八人府四人史八人胥八人徒八十人  
朝士中士六人府三人史六人胥六人徒六十人



司民中士六人府三人史六人胥三人徒三十人

司刑中士二人府一人史二人胥二人徒二十人

司刺下士二人府一人史二人徒四人

司約下士二人府一人史二人徒四人

司盟下士二人府一人史二人徒四人

職金上士二人下士四人府二人史四人胥八人徒八十人

司厲下士二人史一人徒十有二人

犬人下士二人府一人史二人賈四人徒十有六人

司園中士六人下士十有二人府三人史六人胥十有六人徒百有六十人

掌囚下士十有二人府六人史十有二人徒百有二十人

掌戮下士二人史一人徒十有二人

司隸中士二人下士十有二人府五人史十人胥二十人徒二百人

罪隸百有二十人

蠻隸百有二十人

閩隸百有二十人

夷隸百有二十人

貉隸百有二十人

布憲中士二人下士四人府二人史四人胥四人徒四十人  
禁殺戮下士二人史一人徒十有二人

禁暴氏下士六人史三人胥六人徒六十人

野廬氏下士六人胥十有二人徒百有二十人

蜡氏下士四人徒四十人

雍氏下士二人徒八人

萍氏下士二人徒八人

萍之浮物不沈溺又勝酒故掌國之水禁幾酒謹酒

禁川游者謂之萍氏

司寤氏下士二人徒八人

司烜氏下士六人徒十有二人

條狼氏下士六人胥六人徒六十人

脩閭氏下士二人史一人徒十有二人

冥氏下士二人徒八人

庶氏下士一人徒四人

穴氏下士一人徒四人

翼氏下士二人徒八人

柞氏下士八人徒二十人

雍氏下士二人徒二十人

荅蒺氏下士一人徒二人

翦氏下士一人徒二人

赤友氏下士一人徒二人

蠲氏下士一人徒二人

壺涿氏下士一人徒二人

庭氏下士一人徒二人

銜枚氏下士二人徒八人

伊耆氏下士一人徒二人

大行人中大夫二人小行人下大夫四人司儀上士八

人中士十有六人行夫下士三十有二人府四人史八人胥八人徒八十人

環人中士四人史四人胥四人徒四十人

象胥每翟上士一人中士二人下士八人徒二十人

掌客上士二人下士四人府一人史二人胥二人徒二十人

掌訝中士八人府二人史四人胥四人徒四十人

掌交中士八人府二人史四人徒三十有二人

掌察四方中士八人史四人徒十有六人

掌貨賄下士十有六人史四人徒三十有二人

朝大夫每國上士二人下士四人府一人史二人庶子

八人徒二十人

都則中士一人下士二人府一人史二人庶子四人徒

八十人

都士中士二人下士四人府二人史四人胥四人徒四

十人家士亦如之



大司寇之職掌建邦之三典以佐王刑邦國詰四方  
邦國刑之所加故曰刑邦國四方則有威讓之令有  
文告之辭布令陳辭而又不至則又增修于德而已  
故曰詰四方

一曰刑新國用輕典二曰刑平國用中典三曰刑亂國  
用重典

刑新國用輕典則教化未明習俗未成以柔乂之也  
刑平國用中典則教化已明習俗已成以正直乂之

也刑亂國用重典則頑昏暴悖不可教化以剛又之也故書云惟敬五刑以成三德

以五刑糾萬民一曰野刑上功糾力二曰軍刑上命糾守三曰鄉刑上德糾孝四曰官刑上能糾職五曰國刑上愿糾暴

野刑為事故上功糾力力所以致功軍刑為政故上命糾守守所以致命鄉刑為教故上德糾孝孝所以致德官刑為治故上能糾職職所以致能國刑刑也

故上愿糾暴失愿而暴刑所取也然則刑無為禮乎  
曰禮之施萬民者在教而已自野刑序之以至于國  
則與書序蠻夷猾夏寇賊姦宄同意

以園土聚教罷民凡害人者寘之園土而施職事焉以  
明刑恥之其能改者反于中國不齒三年其不能改而  
出園土者殺

凡害人者謂有過失而麗于法者也其獄謂之園土  
則有生養之意也其人謂之罷民則不自強以禮故

也施職事焉則使知自強以明刑恥之則使知自好  
其能改者反于中國不齒三年者寘之園土外之于  
中國也故其能改而反也謂之反于中國其收之也  
三讓而罰三罰而歸之園土及與其能改亦不可以一  
年而足故不齒三年三年無違則亦久矣于是以倫  
類序之其不能改而出園土者殺則上所以宥而教  
之至矣既不能改又逃焉殺之義也先王之于民也  
德以教之禮以賓之仁以宥之義以制之善者怙焉

不善者懼焉故居則易以治動則易以服

以兩造禁民訟入束矢於朝然後聽之以兩劑禁民獄入鈞金三日乃致于朝然後聽之

以兩造禁民訟者訟以兩造聽之而無所偏受則不直者自反而民訟禁矣入束矢于朝然後聽之者以束矢自明其直然後聽蓋不直則入其矢亦所以懲其不直以兩劑禁民獄者獄以兩劑聽之而無所偏信則不直者自反而民獄禁矣入鈞金三日乃致于

朝然後聽之者以鈞金自明其不可變然後聽蓋不信則入其金亦所以懲不信獄必三日然後聽則重致民于獄也獄必以劑則訟至于獄無簡不聽非特劑而已舉劑以見類焉

以嘉石平罷民凡萬民之有罪過而未麗於灋而害於州里者桎梏而坐諸嘉石役諸司空重罪旬有三日坐暮役其次九日坐九月役其次七日坐七月役其次五日坐五月役其下罪三日坐三月役使州里任之則宥

而舍之

嘉合禮之善也以嘉石平罷民罷民不能自強以禮故也萬民之有罪過而未麗于法而害于州里者則司救所謂袞惡也凡害人者則司救所謂過失是也過失不謂之罪而得罪反重于袞惡則為其已麗于法故也惟其過失是以未入于刑不虧其體而以圖土教之也袞惡謂之罪而得罪反輕于過失為其未麗于法故也坐諸嘉石使自反焉且以恥之役諸司

空則以彊其罷故也重罪旬有三日坐暮役其次九日坐九月役其次七日坐七月役其次五日坐五月役其下罪三日坐三月役則報之各稱其罪之輕重使州里任之則宥而舍之則無任者終不舍焉是乃所以使州里相安也先王善是法以為其刑人也不虧體其罰人也不虧財非特如此而已司空之役不可廢也與其徭平民而苦之孰若役此以安州里之為利也



以肺石達窮民凡遠近惇獨老幼之欲有復於上而其  
長弗達者立於肺石三日士聽其辭以告於上而罪其長  
肺之情憂其竅為鼻以肺石達窮民則以其憂在內  
不能自達故也非此疾也不為窮民以大僕觀之則  
欲其速達甚于遽令然而立于肺石三日然後聽則  
又惡民之瀆其上民瀆其上憤眊而不滌雖誠無告  
反不暇治矣

正月之吉始和布刑于邦國都鄙乃縣刑象之灋于象

魏使萬民觀刑象挾日而斂之凡邦之大盟約涖其盟書而登之于天府大史內史司會及六官皆受其貳而藏之

凡邦之大盟約大司寇涖其盟書者刑一成而不可變盟約如之且違焉則刑所取也登之于天府者謹藏之也大史內史司會及六官皆貳而藏之者各以考事焉非特備失亡而已

凡諸侯之獄訟以邦典定之凡卿大夫之獄訟以邦灋

斷之凡庶民之獄訟以邦成弊之

諸侯强大其獄訟難定故言以邦典定之卿大夫親  
貴其獄訟難斷故言以邦法斷之若夫庶民患其情  
偽難弊而已故言以邦成弊之

大祭祀奉犬牲

犬金畜也秋官羞之則各從其類也因致其義焉奉  
不可變之義一于所事致其守禦以佐大事者大司  
寇之職也小司寇小祭祀奉犬牲士師刳珥奉犬牲

與此同義所任有小大而已

若禋祀五帝則戒之日涖誓百官戒于百族

涖誓而戒焉則制百官百族于刑之中義也謂之禋  
祀則致意之精焉刑官佐王事上帝如斯而已天地  
二官不言禋則所以佐王事上帝有大于此者此無  
所事意不期精粗焉

及納亨前王祭之日亦如之奉其明水火凡朝覲會同  
前王大喪亦如之大軍旅涖戮于社凡邦之大事使其

屬蹕

及納亨前王祭之日亦如之者於是也治官以宰制  
斟酌贊王而刑官先焉俾王從欲以治則刑先之故  
也司寇稱祭之日而宰稱祀則宰天官也故稱祀司  
寇秋官也制物之形焉故稱祭明水火之為物潔而  
清明之至也清以察理之在我明以燭事之在物潔  
以革汙穢而除之刑官所以格上帝于是為至朝覲  
會同前王大喪亦如之則與大祭祀前王同義大軍

旅涖戮于社則涖戮刑官之事也蹕者止人使毋敢  
干焉刑官之事也小司寇國之大事使其屬蹕則事  
在國中而已大司寇邦之大事使其屬蹕則事之所  
在通國野焉

小司寇之職掌外朝之政以致萬民而詢焉一曰詢國  
危二曰詢國遷三曰詢立君其位王南鄉三公及州長  
百姓北面羣臣西面羣吏東面小司寇擯以敘進而問  
焉以衆輔志而弊謀

國危國遷立君大事也有疑焉則所謂大疑故致萬民而詢焉三公鄉老也上言三公中言州長下言百姓則鄉官皆在此矣上言萬民下言百姓則詢備矣其言百姓猶洪範之言庶人其言萬民則猶洪範之言庶民也百姓北面荅君也三公及州長北面帥民也羣臣西面羣吏東面則左右其事而已民為貴于是見矣小司寇擯以敘進而問焉以衆輔志而弊謀則以王志而輔之衆以衆謀為稽而弊之於王也

以五刑聽萬民之獄訟附于刑用情訊之至于旬乃弊之讀書則用灋凡命夫命婦不躬坐獄訟凡王之同族有罪不即市

以五刑聽萬民之獄訟者聽獄訟當知罪所麗故也知罪所麗則姦民有可刺之實不能以巧免愚民有可宥之情知所以出之焉附于刑用情訊之者既得其情罪附于刑矣則用情訊之恐其惟從非從也至于旬乃弊之者慎用刑也與書要囚服念五六日至



于旬時丕蔽要囚同義讀書則用法者弊其罪則讀其服罪之書讀其服罪之書則用法而已不以意為輕重訊用情則民得自盡弊用法則吏無所肆焉凡命夫命婦不躬坐獄訟者貴貴也凡王之同族有罪不即市者親親也貴貴親親如此而已豈以故撓法哉

以五聲聽獄訟求民情一曰辭聽二曰色聽三曰氣聽四曰耳聽五曰目聽

聽獄訟求民情以訊鞠作其言因察其視聽氣色以知其情偽故皆謂之聲焉言而色動氣喪視聽失則其偽可知也然皆以辭為主辭窮而情得矣故五聲以辭為先氣色耳目次之

以八辟麗邦灋附刑罰一曰議親之辟二曰議故之辟三曰議賢之辟四曰議能之辟五曰議功之辟六曰議貴之辟七曰議勤之辟八曰議賓之辟

出命制節以治人罪謂之辟八辟有議則非制于法

而已故稱辟焉王所以馭萬民者有八統故其用刑  
有八辟麗邦法附刑罰則若今律稱在八議者亦稱  
定行之律也謂之議則刑誅赦宥未定也然以臯陶  
為士瞽瞍殺人而舜不敢赦則其議之大槩可知矣  
以三刺斷庶民獄訟之中一曰訊羣臣二曰訊羣吏三  
曰訊萬民聽民之所刺宥以施上服下服之刑

聽民之所刺宥以施上服下服之刑則刺宥聽命而  
已訊羣臣訊羣吏則臣吏能循民志而達之者也

及大比登民數自生齒以上登于天府內史司會冢宰貳之以制國用

及大比登民數自生齒以上登于天府者生齒則有食之端有食之端則將任之以職故自生齒以上登其數登于天府則寶而藏之內史司會冢宰貳之以制國用者國用以賦斂制之賦斂多寡以民制之故也

小祭祀奉犬牲凡禋祀五帝實饌水納亨亦如之

曰以木爨火亨飪也實鑊水則濟以木爨火之事而成之秋官之屬也

大賓客前王而辟后世子之喪亦如之小師涖戮凡國之大事使其屬蹕孟冬祀司民獻民數於王王拜受之以圖國用而進退之

內史司會冢宰制國用王圖國用而進退之者圖圖其大計制事為之制雖事為之制而進退之則斷于王馬言圖制國用于此則民之犯刑以其貧而已民

之貧以上賦斂之多而已賦斂之多以不知圖國用制之而已

歲終則令羣士計獄弊訟登中于天府正歲帥其屬而觀刑象令以木鐸曰不用灋者國有常刑令羣士乃宣布于四方憲刑禁乃命其屬入會乃致事

中獄訟之中中言事實之書也天府謂之治中告天謂之升中與此同義

士師之職掌國之五禁之灋以左右刑罰一曰宮禁二

曰宮禁三曰國禁四曰野禁五曰軍禁皆以木鐸徇之  
于朝書而縣于門閭

五禁之法以左右刑罰為以五禁左右之五刑自野  
以及國而五禁自宮以及軍則禁欲其毋犯而已此  
其所以異于刑也

以五戒先後刑罰毋使罪麗于民一曰誓用之于軍旅  
二曰誥用之于會同三曰禁用諸田役四曰糾用諸國  
中五曰憲用諸都鄙

以五戒先後刑罰者以刑罰為中以五戒先後之若  
盤庚上篇則以誥先之也若盤庚下篇則以誥後之  
也誓誥則若湯誓之於伐桀洛誥之於營周為一事  
施一時而已故曰用之於軍旅用之於會同禁糾憲  
則所用非特一事一時故曰用諸田役用諸國中用  
諸都鄙毋使罪麗於民則軍旅為大會同次之田役  
次之國中都鄙則戒之於無事之時先國中後都鄙  
與五禁先近後遠同義



掌鄉合州黨族閭比之聯與其民人之什伍使之相安  
相受以比追胥之事以施刑罰慶賞

掌鄉合州黨族閭比之聯與其民人之什伍者以比  
合比以伍合伍使之相聯也使之相安相受以比追  
胥之事以施刑罰慶賞者去其害人者則使之相安  
使州里任焉而舍之則使之相受相安相受然後可  
以比追胥之事以施刑罰慶賞則廢事者施刑罰有  
功者施慶賞士師掌刑使之相安而已若夫使之相

保則有教存焉非士師所及也

掌官中之政令察獄訟之辭以詔司寇斷獄弊訟致邦令

掌官中之政令者其政令施于其官府之中而已致邦令者有邦令則致之于官府邦國都鄙也

掌士之八成一曰邦汙二曰邦賊三曰邦謀四曰犯邦令五曰撓邦令六曰為邦盜七曰為邦朋八曰為邦誣邦汙汙邦事輕重緩急所在而為鄉背出入者也邦

賊則是為邦賊而已為邦盜則是為邦盜者也非邦盜而已亂之初生以有邦為邦治之不治失政刑矣  
究自內作而為賊姦自外來而為謀固其所也賊謀為害大矣然未如犯邦令之甚令不行則其害非止賊謀犯邦令之不治則擣邦令者至焉擣邦令之不治則為邦盜者至焉易所謂上慢下暴盜思伐之者也然為邦盜者中無主不至為邦朋為邦誣則盜之所主也邦朋非邦誣不立則邦誣非邦朋不成惡直

醜正相與為比守正特立之士不容于時而有大物者無與昭姦此綱紀所以壞大盜所以作然不知禍本在此而以危亡為兢兢亦難以祈無事矣故事之八成其序如此

若邦凶荒則以荒辯之灋治之令移民通財糾守緩刑有移民通財糾守緩刑之事則因有辯矣故有荒辯之法焉大行人言若國凶荒令調委之則令諸侯相調委故言國小司寇言若邦凶荒以荒辯之法治之

則凶荒徧邦然後以荒辯之法治之故言邦荒政無  
糾守而有去幾今此無去幾而有糾守王責諸侯以  
守故可以去幾邦國為王守則有糾守而已

凡以財獄訟者正之以傳別約劑

以此正獄訟則民知無傳別約劑之不可治皆無敢  
苟簡於其始訟之所由省也孔子聽訟吾猶人也故  
於訟欲作事謀始始之不謀及其卒也雖聖人亦未  
如之何矣

若祭勝國之社稷則為之尸

減亡刑之類也

王燕出入則前驅而辟祀五帝則沃尸及王盥洎鑊水  
洎鑊水者續司寇之事而終之

凡刳珥則奉犬牲諸侯為賓則帥其屬而蹕于王宮大  
喪亦如之

大小司寇使其屬則弗親蹕也士師帥其屬則親蹕  
矣大司寇蹕邦事小司寇蹕國事故士師蹕王宮而

已

大師帥其屬而禁逆軍旅者與犯師禁者而戮之歲終則令正要會正歲帥其屬而憲禁令于國及郊野

雖大師然然所禁而戮非但大師也



--	--	--	--	--	--	--	--



欽定四庫全書

周官新義卷十五

宋 王安石 撰

秋官二

鄉士掌國中各掌其鄉之民數而糾戒之聽其獄訟察其辭辨其獄訟異其死刑之罪而要之旬而職聽于朝司寇聽之斷其獄弊其訟于朝羣士司刑皆在各麗其法以議獄訟獄訟成士師受中協日刑殺肆之三日若欲免之則王會其期大祭祀大喪紀大軍旅大賓客則

各掌其鄉之禁令帥其屬夾道而蹕三公若有邦事則為之前驅而辟其喪亦如之凡國有大事則戮其犯命者

遂士掌四郊各掌其遂之民數而糾其戒令聽其獄訟察其辭辨其獄訟異其死刑之罪而要之二旬而職聽于朝司寇聽之斷其獄弊其訟于朝羣士司刑皆在各麗其法以議獄訟獄訟成士師受中協日就郊而刑殺各於其遂肆之三日若欲免之則王令三公會其期若

邦有大事聚衆庶則各掌其遂之禁令帥其屬而蹕六卿若有邦事則為之前驅而辟其喪亦如之凡郊有大事則戮其犯命者

縣士掌野各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽於朝司寇聽之斷其獄弊其訟于朝羣士司刑皆在各麗其法以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役

聚衆庶則各掌其縣之禁令若大夫有邦事則為之前驅而辟其喪亦如之凡野有大事則戮其犯命者

鄉士掌國中各掌其鄉之民數者通掌國中而分掌其鄉焉鄭氏謂鄉士八人四人而分掌三鄉也遂士掌四郊而各掌其遂之民數者通掌四郊而分掌其遂也縣士掌野而各掌其縣之民數者通掌野而分掌其縣也所謂四郊非鄉地所謂野非遂地盖所謂公邑之在郊野者焉而於鄉士言糾戒之遂士縣士

言糾其戒令者鄉治詳故鄉士不特糾之而已又戒  
焉縣遂治畧故遂士縣士無所戒也違其遂縣吏之  
戒令則糾之而已異其死刑之罪而要之者死刑之  
罪定而又要之若今責伏辨矣鄉士旬而職聽于朝  
者慎用刑故也遂士二旬縣士三旬則以遠也羣士  
司刑皆在各麗其法以議獄訟者羣士司刑各有所  
掌若司刑掌五刑之法司刺掌三刺三赦三宥之法  
又或掌官法或掌官成或掌官常故各麗其法也士

師受中協日刑殺者獄訟成而上其中于士師士師受之然後協日刑殺也鄉士刑殺不言所就以縣士遂士推之就國中明矣鄉士若欲免之則王會其期者王親會其期聽而議之也遂士王令三公會其期縣士王命六卿會其期則遠故也六卿言命三公言令則六卿任事王親命之而已三公尊不任事書命以令焉鄉士三公有邦事則為之前驅而辟遂士六卿有邦事則為之前驅而辟縣士大夫有邦事則為

之前驅而辟為尊者辟行人使避也公卿大夫教治政事所自出非刑官先而辟焉則有所不行其喪亦如之者則喪終事也

方士掌都家聽其獄訟之辭辨其死刑之罪而要之三月而上獄訟于國

方士三月而上獄訟于國鄭氏謂變朝言國以其自有君異之也

司寇聽其成于朝羣士司刑皆在各麗其法以議獄訟

獄訟成士師受中書其刑殺之成與其聽獄訟者凡都家之大事聚衆庶則各掌其方之禁令

司寇聽其成于朝則獄訟成而後上于國也既成而後上于國而于羣士司刑麗法以議又言獄訟成者前所謂成都家聽斷之成也後所謂成司寇羣士司刑聽議之成也書其刑殺之成與其聽訟獄者鄭氏謂備反復有失實者

以時修其縣法若歲終則省之而誅賞焉凡都家之士



所上治則主之

以時修其縣法若歲終則省之而誅賞焉者省蓋巡而視之與省方同義鄭氏謂縣法縣師之職也方士歲時修此法歲終則又省之而誅賞焉

訝士掌四方之獄訟諭罪刑于邦國凡四方之有治於士者造焉四方有亂獄則往而成之邦有賓客則與行人送逆之入於國則為之前驅而辟野亦如之居館則師其屬而為之蹕誅戮暴客者客出入則道之有治則

贊之凡邦之大事聚衆庶則讀其誓禁

訝士掌四方之獄訟故邦有賓客則與行人送逆之  
入于國則為之前驅而辟野亦如之居館則帥其屬  
而為之蹕也

朝士掌建邦外朝之法左九棘孤卿大夫位焉羣士在  
其後右九棘公侯伯子男位焉羣吏在其後而三槐三  
公位焉州長衆庶在其後左嘉石平罷民焉右肺石達  
窮民焉

右公侯伯子男尊故也羣吏在其後則外朝聽獄弊  
訟之朝也故治事者在焉面三公位焉州長衆庶在  
其後則答王故也棘之為木也其華白義行之發也  
其實赤事功之就也東在外所以待事也槐之為木  
也其華黃中德之暢也其實玄至道之復也文在中  
含章之義也右窮民則不傲無告故右焉司士以正  
朝儀之位辨貴賤之等為職故其序朝位先尊後卑  
朝士以掌建外朝之法為職故其序朝位先卑後尊

先卑後尊則先法之所制者

帥其屬而以鞭呼趨且辟禁慢朝錯立族談者

以鞭呼趨且辟呼朝者使趨焉又為之辟也呼趨則  
戒以肅辟則使人避焉禁慢朝錯立族談者朝當如  
此故孔子在朝廷便便言唯謹爾孟子不踰階而揖  
不歷位而言

凡得獲貨賄人民六畜者委于朝告于士旬而舉之大  
者公之小者庶民私之

易得曰得難得曰獲獲伺度而得之也人民在貨賄  
之後蓋奴虜之亡者市民所會伺察者衆故曰獲貨  
賄六畜其亡必得故曰得舉之民無私焉則亦市之  
為治欲民不以無故得利也三日而舉之則民所會  
也其求宜速朝之所委則亡不必得故小者使民私  
焉使民私焉則亦朝之為治欲不盡利以遺民也求  
者或遠則待之宜緩故旬而舉之市不言獲人民則  
市之所會幾察者衆非亡民所赴也

凡士之治有期日國中一旬郊二旬野三旬都三月邦國  
朞期內之治聽期外不聽

民之所急宜以時治苟為不急又在期外亦可以已  
矣夫獄訟追證無罪之民豫受其弊則其不急豈可  
長哉

凡有責者有判書以治則聽

有判書以治則聽者以責與人必使有判書其抵冒  
而訟有判書則為之聽治焉

凡民同貨財者令以國法行之犯令者刑罰之

凡民同貨財者令以國法行之犯令者刑罰之者刑  
罰其犯令者而已不誅同財之人也若貨不出于關  
而舉其貨罰其入所謂國法也二人同財而一人犯  
此令則并舉其貨焉是為令以國法行之若夫罰則  
施犯令者一人而已

凡屬責者以其地傅而聽其辭

以責屬人必使有傳傳必有地著其相抵冒而訟以

其地傳來乃為之聽治屬責而無傳有傳而無地著  
不知所在不可追證則弗聽也

凡盜賊軍鄉邑及家人殺之無罪凡報仇讎者書於士  
殺之無罪若邦凶荒札喪寇戎之故則令邦國都家縣  
鄙慮刑貶

軍謂衆攻圍鄉邑及家則人得殺之仇讐之罪已書  
於士而得則士之所殺也已書於士而不得則罪不  
嫌于不明故許之專殺也思患曰慮慮刑則非特緩



刑而已若荒政除盜賊費誓無餘刑非殺則以災寇之故有加急焉故令慮以制之慮貶則用財當貶於平時然欲適宜則亦不可以無慮也

司民掌登萬民之數自生齒以上皆書於版辨其國中與其都鄙及其郊野異其男女歲登下其死生及三年天比以萬民之數詔司寇司寇及孟冬祀司民之日獻其數于王王拜受之登于天府內史司會冢宰貳之以贊王治

於小司寇言內史司會冢宰貳民數制國用王受民  
數圖國用而進退之而於司民云內史司會冢宰貳  
之以贊王治者司民掌民數之官也生齒之不蕃至  
於具禍以燼則以王無陪無卿無義治之非特為貧  
故也

司刑掌五刑之法以麗萬民之罪墨罪五百劓罪五百  
宮罪五百剕罪五百殺罪五百若司寇斷獄弊訟則以  
五刑之法詔刑罰而以辨罪之輕重

先王之懲民也以讓為不足然後罰以罰為不足然後獄之圜土役之司空以獄而役之為不足然後墨以墨為不足然後劓以劓為不足然後宮以宮為不足然後剕以剕為不足然後殺墨劓宮剕殺棄人之刑也以殺為不足則又有奴其父母妻子者奴其父母妻子非刑之正也故不列于此

司刺掌三刺三宥三赦之法以贊司寇聽獄訟壹刺曰訊羣臣再刺曰訊羣吏三刺曰訊萬民壹宥曰不識再

宥曰過失三宥曰遺忘壹赦曰幼弱再赦曰老旄三赦曰蠢愚以此三法者求民情斷民中而施上服下服之罪然後刑殺

不識過失遺忘致慎則或可以免焉故宥之而已幼弱老旄蠢愚則非人之能為也故赦之蠢愚蠢而愚也孔子曰古之愚也直今之愚也詐而已所謂蠢愚則異乎今之愚矣蓋愚而非蠢幼而不弱老而不旄則不在所赦矣以此三法者求民情斷民中而施上

服下服之罪然後刑殺者罪在所刺則下刑有適重而上服罪在所宥則上刑有適輕而下服以三法者求民情然後斷民中斷民中然後施罪施罪定矣然後刑殺若在所赦則赦之矣

司約掌邦國及萬民之約劑治神之約為上治民之約次之治地之約次之治功之約次之治器之約次之治摯之約次之

治神之約謂若魯用郊之屬治民之約謂若分衛以

士族之屬治地之約謂若取於相土之東都以會王  
蒐之屬治功之約謂若虢叔虢仲勲在王室藏在盟  
府之屬治器之約謂若魯得用四代之器之屬治摯  
之約謂若公孫黑使強委禽之屬凡此諸治皆有許  
與之約焉不信而訟則司約掌之

凡大約劑書於宗彝小約劑書於丹圖若有訟者則珥  
而辟藏其不信者服墨刑若大亂則六官辟藏其不信  
者殺

珥而辟藏重其事六官辟藏則以盟約六官皆受其貳藏之故也

司盟掌盟載之法凡邦國有疑會同則掌其盟約之載及其禮儀北面詔明神既盟則貳之盟萬民之犯命者詛其不信者亦如之凡民之有約劑者其貳在司盟有獄訟者則使之盟詛凡盟詛各以其地域之衆庶共其牲而致焉既盟則為司盟共祈酒脯

謂之明神則宜鄉明者也故北面詔之質于明神以

相要者民之所不免也先王因以覆盟詛為大戮而躬信畏以先之至其成俗盟邦國不協與民之犯命而詛其不信者有獄訟者使之盟詛弭亂息爭豈小補哉及後世王迹熄慢神誣人實倍其上神亦既厭莫之顧省則區區牲血酒脯不足以勝背誕之衆矣盖治有本末本之不圖無事於末故君子屢盟詩以為亂是用長鄭伯詛射穎攷叔者傳以為失政刑矣職金掌凡金玉錫石丹青之戒令受其入征者辨其物



之媿惡與其數量楬而璽之入其金錫于為兵器之府  
入其玉石丹青于守藏之府入其要掌受士之金罰貨  
罰入于司兵旅于上帝則共其金版饗諸侯亦如之凡  
國有大故而用金石則掌其令

士之金罰蓋所謂金作贖刑而司寇無金贖之法或  
者掌貨賄有焉

司厲掌盜賊之任器貨賄辨其物皆有數量賈而楬之  
入于司兵其奴男子入于罪隸女子入于舂櫓凡有爵

者與七十者與未齒者皆不為奴

其奴男子入于罪隸則為隸民焉女子入于舂槩則以役舂人槩人之事凡有爵者七十者與未齒者皆不為奴則鄭氏謂奴從坐沒入縣官者是也蓋盜賊之罪有殺不足以懲之者所謂無餘刑非殺也

犬人掌犬牲凡祭祀共犬牲用牲物伏瘞亦如之凡幾珥沈辜用駟可也凡相犬牽犬者屬焉掌其政治

犬人掌犬牲而凡相犬牽犬者屬焉掌其政治則并

掌田犬矣鄭氏謂伏犬以車轢之瘞地祭也

司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不齒凡圜土之刑人也不虧體其罰人也不虧財

司寇謂之聚教而司圜謂之收教則致其詳焉

掌囚掌守盜賊凡囚者上罪梏拲而桎中罪桎梏下罪梏王之同族拲有爵者桎以待弊罪及刑殺告刑于王

奉而適朝士加明梏以適市而刑殺之凡有爵者與王之同族奉而適甸師氏以待刑殺

掌囚凡囚皆守焉而特言盜賊者盜賊必囚而守之故也梏在脰桎在足拳在手左氏傳子蕩以弓梏華弱于朝則梏在脰明矣明梏著其罪于梏猶明刑也掌戮掌斬殺賊諜而搏之凡殺其親者焚之殺王之親者辜之凡殺人者踣諸市肆之三日刑盜于市凡罪之麗於法者亦如之唯王之同族與有爵者殺之于甸師

氏凡軍旅田役斬殺刑戮亦如之

斬殺賊諜而搏之者已得則斬殺之未得則搏之凡殺其親者焚之者賊仁莫甚焉故也殺王之親者辜之者賊義莫甚焉故也刑盜于市凡罪之麗于法者亦如之者所謂刑人于市非特于衆棄之亦以人之犯刑皆以趨利為本正以趨利犯刑則唯盜而已故特言刑盜于市也

墨者使守門劓者使守闕宮者使守內劓者使守圉髡

者使守積

墨者使守門劓者使守關皆無妨無禁禦故也劓罪重故遠之刖者使守圜則妨於禁禦可使牧禽獸而已髡者使守積則王族無宮髡之而已使守積積在隱故也

司隸掌五隸之法辨其物而掌其政令帥其民而搏盜賊役國中之辱事為百官積任器凡囚執人之事邦有祭祀賓客喪紀之事則役其煩辱之事掌帥四翟之隸

使之皆服其邦之服執其邦之兵守王宮與野舍之厲禁

罪隸掌役百官府與凡有守者掌使令之小事凡封國若家牛助為牽徬其守王宮與其厲禁者如蠻隸之事蠻隸掌役校人養馬其在王宮者執其國之兵以守王宮在野外則守厲禁

閩隸掌役畜養鳥而阜蕃教擾之掌子則取隸焉掌役畜養鳥役於掌畜也

夷隸掌役牧人養牛馬與鳥言其守王宮者與其守厲禁者如蠻隸之事

貉隸掌役服不氏而養獸而教擾之掌與獸言其守王宮者與其守厲禁者如蠻隸之事

不言阜蕃猛獸非阜蕃之物

布憲掌憲邦之刑禁正月之吉執旌節以宣布于四方而憲邦之刑禁以詔四方邦國及其都鄙達于四海凡邦之大事合衆庶則以刑禁號令



宣布于四方者以宣布故言四方與詩四方于宣同義以詰四方邦國及其都鄙則詰及邦國之都鄙非特邦國而已達於四海則四方之遠極于四海凡邦之大事合衆庶則以刑禁號令謂于邦有大事鄉合州黨族閭比之聯與其民人之什伍則以刑禁號令焉

禁殺戮掌司斬殺戮者凡傷人見血而不以告者攘獄者遏訟者以告而誅之

掌司斬殺戮者謂非以法斬殺戮者司之以告而誅之也傷人見血而不以告者攘獄者過訟者謂有司宜告而不以告宜授而攘過之見傷而不自言與獄訟而見攘過非善良則窮弱侵善良抑窮弱刑禁所為設也

禁暴氏掌禁庶民之亂暴力正者撓誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出入者則司牧之戮其犯禁者

力正謂人言不可聽不可從以力正之使聽而從焉  
士昏禮曰父西面戒之必有正焉與此正同義政之  
不明也以下之難知政之不行也以下之難制矯誣  
作言語而不信下之難知者也暴亂力正犯禁下之  
難制者也上之所誅於是為急誅庶民如此則自上  
可知矣

野廬氏掌達國道路至於四畿比國郊及野之道路宿  
息井樹若有賓客則令守涂地之人聚橐之有相翔者

誅之凡道路之舟車輦互者敘而行之凡有節者及有爵者至則為之辟禁野之橫行徑踰者凡國之大事比修除道路者掌凡道禁邦之大師則令掃道路且以幾禁行作不時者不物者

三十里有宿宿有路室所謂宿也十里有廬廬有飲食所謂息也橫行謂不由道徑徑踰謂不由橋梁國之大事則在國中而已邦之大師則通國野焉

蜡氏掌除骴凡國之大祭祀令州里除不蠲禁刑者任

人及凶服者以及郊野大師大賓客亦如之若有死於道路者則令埋而置楬焉書其日月焉縣其衣服任器於有地之官以待其人掌凡國之黜禁

任人謂司圜任之以事之人大賓客亦令州里除不蠲禁刑者任人及凶服者以及郊野則承事如祭有齊敬之心焉

雍氏掌溝瀆澮池之禁凡害于國稼者春令為阱獲溝瀆之利於民者秋令塞阱杜獲

害於國稼謂害國及稼不言野而言稼蓋野之禁唯稼而已

禁山之為苑澤之沈者

沈酖也禁山之為苑不使民專利禁澤之沈者惡其所害衆

萍民掌國之水禁幾酒謹酒禁川游者

幾酒微察其不節也謹酒謹制其無度也

司寤氏掌夜時以星分夜以詔夜士夜禁禦晨行者禁

宵行者夜遊者

詩曰肅肅宵征抱衾與稠則宵非中夜矣詩曰夜如何其夜鄉晨則自宵以至於晨皆所謂夜時禦晨行者則禦使須明而行禁宵行者則禁之使止也禁夜遊者則遊非其時雖不行亦禁焉

司烜氏掌以夫遂取明火於日以鑒取明水於月以共祭祀之明盥明燭共明水凡邦之大事共墳燭庭燎中春以木鐸脩火禁于國中軍旅脩火禁邦若屋誅則為

明竈焉

明燭以明火為燭明盞以明水為盞鄭氏謂取火于  
日取水於月欲得陰陽之潔氣也墳燭大燭屋誅蓋  
舉家得罪而誅者也明竈蓋揭其罪於竈上若明刑  
明梏

條狼氏掌執鞭以趨辟王出入則八人夾道公則六人  
侯伯則四人子男則二人凡誓執鞭以趨於前且命之  
誓僕右曰殺誓馭曰車轡誓大夫曰敢不關鞭五百誓



師曰三百誓邦之大史曰殺小史曰墨

掌執鞭趨以辟者趨而避也條狼主誓者掌辟之官以禁止為事故也誓僕右者為僕為右誓其屬也誓馭者為馭誓其屬也僕右曰殺馭曰車轆則軍旅之事僕右之政當如此誓大夫曰敢不闕鞭五百則大夫不掌軍政當豫聞而已故誓之事曰敢不闕誓之刑曰鞭五百師誓其屬曰三百則所誓樂人而已大史曰殺則大軍旅抱天時從焉誓其屬不可以不嚴

小史曰墨則佐大史而已於大史曰邦之大史則明此所為誓皆王宮于史稱邦則師以上皆可知也

脩閭氏掌比國中宿互櫟者與其國粥而比其追胥者而賞罰之禁徑踰者與以兵革趨行者與馳騁於國中者邦有故則令守其閭互唯執節者不幾

國粥謂行粥物于國中者市官所不治故修閭氏比之不言禁橫行則國中故也

冥氏掌設弧張為阱獲以攻猛獸以靈鼓毆之若得其

獸則獻其皮革齒須備

設弧以射之設張以伺之為阱獲以陷之以靈鼓毆之則使趨所陷焉

庶氏掌除毒蠱以攻說禴之嘉草攻之凡毆蠱則令之比之

以攻說禴之則用祝焉以嘉草攻之則用葯焉

穴氏掌攻蟄獸各以其物火之以時獻其珍異皮革

翬氏掌攻猛鳥各以其物為媒而椅之以時獻其羽翮

各以其物為媒而椅之者媒之以其類也攻猛鳥以除人物之害焉非特利其羽翮而已孟子曰鳥獸之害人者消然後人得平土而居之

柞氏掌攻草木及林麓夏日至令刊陽木而火之冬日至今剝陰木而水之若欲其化也則春秋變其水火凡攻木者掌其政令

雞氏掌殺草春始生而萌之夏日至而夷之秋繩而芟之冬日至而耜之若欲其化也則以水火變之掌凡殺

草之政令

春始生而萌之則始生而夷之不能使其不生故萌之而弗治焉夏日至而夷之則生氣極矣於是乎可夷秋繩而芟之則夷而又生生而芟之也冬至則生氣復之時於是耜之則不復生矣若欲其化也則以水火變之者月令所謂燒薙行水也於是草化焉鄭氏謂含實曰繩蓋以繩為繩

若族氏掌覆天鳥之巢以方書十日之號十有二辰之

號十有二月之號十有二歲之號二十有八星之號縣其巢上則去之

盖日辰月歲星之神凡有氣形者制焉故書其號焉可以勝天

翦氏掌除蠹物以攻榮攻之以莽草熏之凡庶蠱之事赤友氏掌除牆屋以蜃炭攻之以灰洒毒之凡隙屋除其狸蠱

狸蠱亦有害人者故除之

蝮氏掌去鼃黽焚牡鞠以灰洒之則死以其煙被之則凡水蟲無聲

去鼃黽使水蟲無聲亦置官者養至尊具官備物焉且先王之齋去樂以致一方是時也蟲之怒鳴安可以弗除除則宜有掌之者矣

壺涿氏掌除水蟲以炮土之鼓毆之以焚石投之若欲殺其神則以牡槀午貫象齒而沈之則其神死淵為陵除水蟲殺淵神為其有害人者今南方有所謂淵神

者民犯之能出為崇

庭氏掌射國中之天鳥若不見其鳥獸則以救日之弓  
與救月之矢射之若神也則以大陰之弓與枉矢射之  
鳥獸言夜射則神以晝射矣嘗用此救日月焉故其  
精氣足以勝天鄭氏謂太陰之弓救月者也枉矢救  
日者也

銜枚氏掌司囂國之大祭祀令禁無囂軍旅田役令銜  
枚禁詔呼歎鳴於國中者行歌哭於國中之道者



伊耆氏掌國之大祭祀共其杖咸軍旅授有爵者杖共王之齒杖

杖咸鄭氏謂去杖以函盛之既事乃受共王之齒杖鄭氏謂王所以賜老者之杖唯大祭祀共杖函蓋非大祭祀則杖於朝者弗豫焉

